

白氏長慶集序

浙東觀察使元稹字微之



白氏長慶集者太原人白居易之所作

居易字樂天始言試指之無二字

能不誤

具樂天與子書

始既言讀書勤敏與他兒

異五六歲識聲韻十五志詩賦二十七

舉進士貞元末進士尚馳競不尚文就



中六籍允擯落禮部侍郎高郢始用經  
藝為進退樂天一舉擢上第明年拔萃  
甲科由是性習相近遠求玄珠斬白蛇  
等賦及百道判新進士競相傳於京師  
矣會憲宗皇帝冊召天下士樂天對詔  
稱旨又登甲科未幾入翰林掌制誥比  
比上書言得失因為賀雨秦中吟等數

十章指言天下事時人比之風騷焉予  
始與樂天同校祕書之名多以詩章相  
贈答會予謫掾江陵樂天猶在翰林寄  
予百韻律詩及雜體前後數十章是後  
各佐江通復相訓寄巴蜀江楚間洎長  
安中少年遞相倣效競作新詞自謂為  
元和詩而樂天秦中吟賀雨諷諭等篇



時人罕能知者然而二十年間禁省觀  
寺郵候墻壁之上無不書王公妾婦牛  
童馬走之口無不道至於繕寫模勒街  
賣於市井或持之以交酒茗者處處皆  
是揚越間多作書模勒樂天及予雜詩賣於市肆之中也其甚者有至於盜

竊名姓苟求自售雜亂間廁無可奈何

予嘗於平水市中

鏡湖傍草市名

見村校諸童競

習詩召而問之皆對曰先生教我樂天  
微之詩固亦不知予之為微之也又云  
雞林賈人求市頗切自云本國宰相每  
以百金換一篇其甚偽者宰相輒能辨  
別之自篇章章以來未有如是流傳之廣  
者長慶四年樂天自杭州刺史以右庶  
子詔還予時刺會稽因得盡徵其文手




自排續成五十卷凡二千一百九十一  
者前輩多以前集中集為名予以為陞  
下明年秋當改元長慶於是因號曰白  
氏長慶集大凡人之文各有所長樂天  
之長可以為多矣夫以諷諭之詩長於  
激閑適之詩長於遣感傷之詩長於切  
五字律詩百言而上長於贍五字七字  
百言而下長於情賦贊箴戒之類長於  
當碑記叙事制誥長於實啓奏表狀長  
於直書檄詞策剖判長於畫總而言之  
不亦多乎哉至於樂天之官族景行與  
予之交分淺深非叙文之要也故不書  
長慶四年冬十二月十日微之序





白氏長慶集總目

第一帙



第一

諷諭一

古調詩

第二

諷諭二

古調詩

第三

諷諭三

新樂府

第四

諷諭四

新樂府

第五

閑適一

古調詩

第六

閑適二

古調詩

第七

閑適三

古調詩

第二帙

第八

閑適四

古調詩

第九

感傷一

古調詩



第十

感傷二

古調詩

第十一

感傷三

古調詩

第十二

感傷四

詞行曲引

第十三

律詩一

第二帙

第十四

律詩二

第十五

律詩三

第十六

律詩四

第十七

律詩五

第十八

律詩六

第十九

律詩七

第二十

律詩八

第四帙

第二十一

雜體

歌行

第二十二

律詩

第二十三

律詩

第二十四

格詩

雜體

第二十五

律詩

第二十六

律詩

第五帙

第二十七

律詩

第二十八

律詩

第二十九

律詩

第三十

律詩

第三十一 律詩

第三十二 律詩

第三十三 律詩

第六帙

第三十四 律詩

第三十五 律詩

第三十六 半格詩 律詩附

第三十七 律詩

第三十八 詩賦

第三十九 銘贊箴誦偈

第四十 哀祭文

第四十一 碑碣

第四十二 墓誌銘

第七帙

第四十二 記序

第四十四 書

第四十五 書序

第四十六 書頌議論狀

第四十七 試策問制誥

第四十八 中書制誥一 舊體

第四十九 中書制誥二 舊體

第五十 中書制誥三 舊體

第五十一 中書制誥四 新體 祭文附

第五十二 中書制誥五 新體



第八帙

第五十三

中書制誥六

新體

第五十四

翰林制誥一

擬制附

第五十五

翰林制誥二

擬制附

第五十六

翰林制誥三

勅書批答祭文贊文附

第五十七

翰林制誥四

勅書批答祭文贊文附

第五十八

奏狀一

第五十九

奏狀二

第九帙

第六十

奏狀三

第六十一

奏狀四

第六十二

策林一

第六十三

策林二

第六十四

策林三

第六十五

策林四

第六十六

甲乙判一

第十帙

第六十七

甲乙判二

第六十八

碑誌序記表贊論衡書

第六十九

碑序解祭文記

第七十

銘誌序贊祭文記辭傳

第七十一

碑記銘吟偈

白氏文集卷第一

諷諭一

古調詩五言  
凡六十五首

賀雨

皇帝嗣寶曆元和三年冬自冬及春暮不雨旱熯熯  
上心念下民懼歲成災凶遂下罪已詔殷勤制萬邦  
帝曰予一人繼天承祖宗憂勤不遑寧夙夜心忡忡  
元年誅劉闢一舉靖巴邛二年戮李錡不戰安江東  
顧惟眇眇德遽有巍巍功或者天降沴無乃儆予躬  
上思蒼天戒下思致時邕莫如率其身慈和與儉恭  
乃命罷進獻乃命賑饑窮宥死降五刑責已寬三農  
宮女出宣徽廐馬減飛龍庶政靡不舉皆由自宸衷  
奔騰道路人偃僂田野翁歡呼相告報感泣涕沾鬢



順人人心悅先天天意從詔下纔七日和氣生沖融  
疑爲悠悠雲散作習習風晝夜三日雨淒淒復濛濛  
萬心春熙熙百穀青芄芄人變愁爲喜歲易儉爲豐  
乃知王者心憂樂與衆同皇天與后土所感無不通  
冠珮何鏘鏘將相及王公蹈舞呼萬歲列賀明庭中  
小臣誠愚陋職忝金鑾宮稽首再三拜一言獻天聰  
君以明爲聖臣以直爲忠敢賀有其始亦願有其終

讀張籍古樂府

張君何爲者業文三十春猶工樂府詩舉代少其倫  
爲詩意如何六義互鋪陳風雅比興外未嘗著空文  
讀君學仙詩可諷放佚君讀君董公詩可誨貪暴臣  
讀君商女詩可感悍婦仁讀君勤齊詩可勸薄夫敦

上可裨教化舒之濟萬民下可理情性卷之善一身  
始從青衿歲迨此白髮新日夜秉筆吟心苦力亦勤  
時無采詩官委棄如泥塵恐君百歲後滅没人不聞  
願藏中秘書百代不湮淪願播內樂府時得聞至尊  
言者志之苗行者文之根所以讀君詩亦知君爲人  
如何欲五十官小身賤貧病眼街西住無人行到門

哭孔戡

洛陽誰不死戡死聞長安我是知戡者聞之涕泫然  
戡佐山東軍非義不可干拂衣向西來其道直如絃  
從事得如此人人以爲難人言明明代合置在朝端  
或望居諫司有事戡必言或望居憲府有邪戡必彈  
惜哉兩不諧沒齒爲閒官竟不得一日蹇蹇立君前



形骸隨衆心歛葬北邙山平生剛腸內直氣歸其間  
賢者爲生民生死懸在天謂天不愛人胡爲生其賢  
爲天果愛民胡爲奪其年茫茫元化中誰執如此權

凶宅

長安多大宅列在街西東往往朱門內房廊相對空  
梟鳴松桂枝狐藏蘭菊叢蒼苔黃葉地日暮多旋風  
前主爲將相得罪竄巴庸後主爲公卿寢疾歿其中  
連延四五主殃禍繼相鍾自從十年來不利主人翁  
風雨壞簷隙蛇鼠穿牆墉人疑不敢買日毀土木功  
嗟嗟俗人心甚矣其愚蒙但恐災將至不思禍所從  
我今題此詩欲悟迷者曾凡爲大官人年祿多高崇  
權重持難久位高勢易窮驕者物之盈老者數之終  
四者如寇盜日夜來相攻假使居吉土孰能保其躬  
因小以明大借家可諭邦周秦宅峻函其宅非不同  
一興八百年一死望夷宮寄語家與國人凶非宅凶

夢仙

人有夢仙者夢身升上清坐乘一白鶴前引雙紅旌  
羽衣忽飄飄玉鸞俄錚錚半空直下視人世塵冥冥  
漸失鄉國處纔分山水形東海一片白列岳五點青  
須臾羣仙來相引朝玉京安期羨門輩列侍如公卿  
仰謁玉皇帝稽首前致誠帝言汝仙才努力勿自輕  
却後十五年期汝不死庭再拜受斯言旣寤喜且驚  
秘之不敢泄誓志居巖扃恩愛捨骨肉飲食斷羶腥  
朝餐雲母散夜吸沆瀣精空山三十載日望輜輶迎



前期過已久鸞鶴無來聲齒髮日衰白耳日減聰明  
一朝同物化身與糞壤并神仙信有之俗力非可營  
苟無金骨相不列丹臺名徒傳辟穀法虛受燒丹經  
只自取勤苦百年終不成悲哉夢仙人一夢誤一生

觀刈麥

時爲盩厔縣尉

田家少閒月五月人倍忙夜來南風起小麥覆隴黃  
婦姑荷簞食童稚攜壺漿相隨餉田去丁壯在南崗  
足蒸暑土氣背灼炎天光力盡不知熱但惜夏日長  
復有貧婦人抱子在其傍右手秉遺穗左臂懸弊筐  
聽其相顧言聞者爲悲傷家田輸稅盡拾此充饑腸  
念我何功德曾不事農桑吏祿三百石歲晏有餘糧  
念此私自愧盡日不能忘

題海圖屏風

元和巳丑年作

海水無風時波濤安悠悠鱗介無小大遂性各沉浮  
突兀海底鼇首冠三神丘釣網不能制其來非一秋  
或者不量力謂茲鼇可求負鼻牽不動綸絕沉其鈎  
一鼇旣頓頷諸鼇齊掉頭白濤與黑浪呼吸繞咽喉  
噴風激飛廉鼓波怒揚侯鯨鯢得其便張口欲吞舟  
萬里無活鱗百川多倒流遂使江漢水朝宗意亦休  
蒼然屏風上此畫良有由

羸駿

驪駟失其主羸餓無人牧向風嘶一聲莽蒼黃河曲  
踏冰水畔立臥雪塚間宿歲暮田野空寒草不滿腹  
豈無市駿者盡是凡人目相馬失於瘦遂遺千里足



村中何擾擾有吏徵芻粟淪彼軍廩中化作駑駘肉

廢琴

絲桐合為琴中有太古聲古聲淡無味不稱今日情  
玉徽光彩滅朱絃塵土生廢棄來已久遺音尚泠泠  
不辭為君彈縱彈人不聽何物使之然羗笛與秦箏

李都尉古劍

古劍寒黯黯鑄來幾千秋白光納日月紫氣排斗牛  
有客借一觀愛之不敢求湛然玉匣中秋水澄不流  
至寶有本性精剛無與儔可使寸寸折不能繞指柔  
願快直士心將斷佞臣頭不願報小怨夜半刺私讎  
勸君慎所用無作神兵羞

雲居寺孤桐

一株青玉立千葉綠雲委亭亭五丈餘高意猶未已  
山僧年九十清淨老不死自云手種時一顆青桐子  
直從萌芽拔高自毫末始四面無附枝中心有通理  
寄言立身者孤直當如此

京兆府新栽蓮

時為鹽屋縣尉趨府作

污溝貯濁水水上葉田田我來一長嘆知是東溪蓮  
下有清泥污馨香無復全上有紅塵撲顏色不得鮮  
物性猶如此人事亦宜然託根非其所不如遭棄捐  
昔在溪中日花葉媚清漣今來不得地顛顛府門前

月夜登閣避暑

暑久炎氣甚中人若燔燒清風隱何處草樹不動搖  
何以避暑氣無如出塵囂行行都門外佛閣正茗堯



清涼近高生煩熱委靜銷開襟當軒坐神泰意飄飄  
迴看歸路傍禾黍盡枯焦獨善誠有計將何救旱苗

初授拾遺

奉詔登左掖束帶參朝議何言初命卑且脫風塵吏  
杜甫陳子昂才名括天地當時非不遇尚無過斯位  
況予蹇薄者寵至不自意驚近白日光慙非青雲器  
天子方從諫朝庭無忌諱豈不思匪躬適遇時無事  
受命已旬月飽食隨班次諫紙忽盈箱對之終自愧

贈元稹

自我從宦遊七年在長安所得惟元君乃知定交難  
豈無山上苗徑寸無歲寒豈無要津水咫尺無波瀾  
之子異於是久處誓不諼無波古井水有節秋竹竿

一爲同心友三及芳歲闌花下鞦韆馬遊雪中杯酒歡  
衡門相逢迎不具帶與冠春風日高睡秋月夜深看  
不爲同登科不爲同署官所合在方寸心源無異端

哭劉敦質

小對兩株栢新土三尺墳蒼蒼白露草此地哭劉君  
哭君豈無辭辭去君子人如何天不弔窮悴至終身  
愚者多貴壽賢者獨賤迤龍亢彼無悔螻屈此不伸  
哭罷持此辭吾將詰義文

荅友問

大圭廉不割利劍用不缺當其斬馬時良玉不如鐵  
置鐵在洪爐鐵消易如雪良玉同其中三日燒不熱  
君疑才與德詠此知優劣



雜興三首

楚王多內寵，傾國選嬪妃。又愛從禽樂，馳騁每相隨。  
錦鞬臂花隼，羅袂控金羈。遂習宮中女，皆如馬上兒。  
色禽合爲荒，刑政兩已衰。雲夢春仍獵，章華夜不歸。  
東風二月天，春鴈正離離。美人挾銀鏑，一發疊雙飛。  
飛鴻驚斷行，歛翅避蛾眉。君王顧之笑，弓箭生光輝。  
迴眸語君曰，昔聞莊王時。有一愚夫人，其名曰樊姬。  
不有此遊樂，三載斷鮮肥。

二

越國政初荒，越天旱不已。風日燥水田，水涸塵飛起。  
國中新下令，官渠禁流水。流水不入田，壅入王宮裏。  
餘波養魚鳥，倒影浮樓雉。澹灩九折池，縈迴十餘里。

荷發越王日，遊嬉左右好。風來香動芙蓉蕊，  
芙蓉香又種芙蓉。子不念閭門外，千里稻苗死。

三

吳王心日侈，服玩盡奇瓌。身卧翠羽帳，手持紅玉杯。  
冠垂明月珠，帶束通天犀。行動自矜顧，數步一徘徊。  
小人知所好，懷寶四方來。奸邪得藉手，從此倖門開。  
古稱國之寶，穀米與賢才。今看君王眼，視之如塵灰。  
伍員諫已死，浮屍去不迴。姑蘇臺下草，麋鹿暗生麇。

宿紫閣山北村

晨遊紫閣峯，暮宿山下村。村老見予喜，爲予開一樽。  
舉杯未及飲，暴卒來入門。紫衣挾刀斧，草草十餘人。  
奪我席上酒，掣我盤中食。主人退後立，歛手反如賓。



中庭有奇樹種來三十春主人惜不得持斧斷其根  
口稱采造家身屬神策軍主人慎勿語中尉正承恩

### 讀漢書

禾黍與稂莠雨來同日滋桃李與荆棘霜降同夜萎  
草木既區別榮枯那等夷茫茫天地意無乃太無私  
小人與君子用置各有宜奈何西漢末忠邪並信之  
不然盡信忠早絕邪臣窺不然盡信邪早使忠臣知  
優游兩不斷盛業日已衰痛矣簫京輩終令陷禍機  
蕭望之京房等每讀元成紀憤憤令人悲寄言爲國者不得  
學天時寄言爲臣者可以鑒於斯

### 贈樊著作

陽城爲諫議以正事其君其手如屈軼舉必指佞臣  
卒使不仁者不得秉國鈞元稹爲御史以直立其身  
其心如肺石動必達窮民東川八十家冤憤一言伸  
劉闢肆亂心殺人正紛紛其嫂曰庾氏弃絕不爲親  
從使萌逆節隱心潛負恩其佐曰孔戡捨去不爲賓  
凡此士與女其道天下聞常恐國史上但寄鳳與鱗  
賢者不爲名名彰教乃敦每惜若人輩身死名亦淪  
君爲著作郎職廢志空存雖有良史才直筆無所申  
何不自著書實錄彼善人編爲一家言以備史闕文

### 蜀路石婦

道傍一石婦無記亦無銘傳是此鄉女爲婦孝且貞  
十五嫁邑人十六夫征行夫行二十載婦獨守孤營  
其夫有父母老病不安寧其婦執婦道一一如禮經



晨昏問起居恭順發心誠藥餌自調節膳羞必甘馨  
夫行竟不歸婦德轉光明後人高其節刻石像婦形  
儼然整衣巾若立在閨庭似見舅姑禮如聞環珮聲  
至今爲婦者見此孝心生不比山頭石空有望夫名

折劍頭

拾得折劍頭不知折之由一握青蛇尾數寸碧峰頭  
疑是斬鯨鯢不然刺蛟虬缺落泥土中委弃無人收  
我有鄙介性好剛不好柔勿輕直折劍猶勝曲全鈎

登樂遊園望

獨上樂遊園四望天日曛東北何靄靄宮闕入煙雲  
愛此高處立忽如遺垢氛耳目暫清曠懷抱鬱不伸  
下視十二街綠樹間紅塵車馬徒滿眼不見心所親

孔生死洛陽元九謫荆門可憐南北路高蓋者何人

酬元九對新栽竹有懷見寄

頃有贈元九詩  
去有節秋竹竿

故元感之  
因重見寄

昔我十年前與君始相識會將秋竹心風霜侵不得  
始嫌梧桐樹秋至先改色不愛楊柳枝春來軟無力  
憐君別我後見竹常相憶常欲在眼前故栽庭戶側  
分首今何處君南我在北吟我贈君詩對之心惻惻

感鶴

鶴有不羣者飛飛在野田饑不啄腐鼠渴不飲盜泉  
貞姿自耿介雜鳥何翩翩同遊不同志如此十餘年  
一興嗜慾念遂爲矰繳牽委質小池內爭食羣雞前  
不惟懷稻梁兼亦競腥羶不惟戀主人兼亦狎鳥鳶



物心不可知天性有時遷一飽尚如此況乘大夫軒

春雪

元和歲在卯六年春二月月晦寒食天天陰夜飛雪  
連宵復竟日浩浩殊未歇大似落鷲毛密如飄玉屑  
寒銷春茫上聲蒼上聲氣變風凜冽上林草盡沒曲江水  
復結紅乾杏花死綠凍楊柳折所憐物性傷非惜年  
芳絕上天有時令四序平分別寒燠苟反常物性皆  
天闕我觀聖人意魯史有其說或記水不冰或書霜  
不殺上將儆政教下以防災孽茲雪今如何信美非  
時節

高僕射

富貴人所愛聖人去其泰所以致仕年著在禮經內

玄元亦有訓知止則不殆二疎獨能行遺跡東門小  
清風久銷歇追此向千載斯人古亦稀何況今之世  
遑遑名利客白首千百輩唯有高僕射七十懸車蓋  
我年雖未老歲月亦云邁預恐耄及時貪榮不能退  
中心私自儆何以爲我戒故作僕射詩書之於大帶

白牡丹

和錢學士作

城中看花客旦暮走營營素華人不顧亦占牡丹名  
開在深寺中車馬無來聲唯有錢學士盡日遶叢行  
憐此皓然質無人自芳馨衆嫌我獨賞移植在中庭  
留景不不暝迎光曙先明對之心亦靜虛白相向生  
唐昌玉蘂花攀翫衆所爭折來比顏色一種如瑤瓊  
彼因稀見貴此以多爲輕始知無正色愛惡隨人情



豈惟花獨爾理與人事并君看入眼者紫艷與紅英

贈內

生為同室親死為同穴塵他人尚相勉而況我與君  
黔婁固窮士妻賢忘其貧翼缺一農夫妻敬儼如賓  
陶潛不營生翟氏自爨薪梁鴻不肯仕孟光甘布裙  
君雖不讀書此事耳亦聞至此千載後傳是何如人  
人生未死間不能忘其身所須者衣食不過飽與溫  
蔬食足充饑何必嘗膏珍繒絮足禦寒何必錦繡文  
君家有貽訓清白遺子孫我亦貞苦士與君新結婚  
庶保貧與素偕老同欣欣

寄唐生

賈誼哭時事阮籍哭路岐唐生今亦哭異代同其悲

唐生者何人五十寒且饑不悲口無食不悲身無衣

所悲忠與義悲甚則哭之太尉擊賊日段太尉以尚

書叱盜時顏尚書叱李希烈大夫死兇寇陸大夫為諫議

蠻夷楊諫議左遷道州每見如此事聲發涕輒隨往往聞其

風俗士猶或非憐君頭半白其志竟不衰我亦君之

徒鬱鬱何所為不能發聲哭轉作樂府詩篇篇無空

文句句必盡規功高虞人箴痛甚騷人辭非求宮律

高不務文字奇惟歌生民病願得天子知未得天子

知甘受時人嗤藥良氣味苦琴淡音聲稀不懼權豪

怒亦任親朋譏人竟無柰何呼作狂男兒每逢羣盜

息或遇雲霧披但自高聲歌庶幾天聽卑歌哭雖異

名所感則同歸寄君三十章與君為哭詞



傷唐衢二首

自我心存道外物少能逼常排傷心事不爲長嘆息  
忽聞唐衢死不覺動顏色悲端從東來觸我心惻惻  
伊昔未相知偶遊滑臺側同宿李鄴家一言如舊識  
酒酣出送我風雪黃河北日西並馬頭語別至昏黑  
君歸向東鄭我來遊上國交心不交面從此重相憶  
憐君儒家子不得詩書力五十着青衣試官無祿食  
遺文僅千首六義無差忒散在京洛間何人爲收拾

二

憶昨元和初忝備諫官位是時兵革後生民  
但傷民病痛不識時忌諱遂作秦中吟一吟悲一事  
貴人皆恠怒閒人亦非訾天高未及聞荆棘生滿地

惟有唐衢見知我平生志一讀興歎嗟再吟墜涕泗  
因和三十韻手題遠緘寄致吾陳杜間賞愛非常意  
此人無復見此詩猶可貴今日開篋看蠹魚損文字  
不知何處葬欲問先歔歔終去哭墳前還君一掬淚

陳杜謂子昂與甫也此詩猶可貴謂唐衢詩也

問友

種蘭不種艾蘭生艾亦生根艾相交長莖葉相附榮  
香莖與臭葉日夜俱長大鋤艾恐傷蘭漑蘭恐滋艾  
蘭亦未能漑艾亦未能除沉吟意不決問君欲何如

悲哉行

悲哉爲儒者力學不知疲讀書眼前暗秉筆手生眊  
十上方一第成名常苦遲縱有宦達者兩鬢已成絲



可憐壯日適在窮賤時丈夫老且病焉用富貴爲  
沉沉朱門宅中有乳臭兒狀貌如婦人光明膏梁肌  
手不把書卷身不環戎衣二十襲封爵門承勳戚資  
春來日日出服御何輕肥朝從博徒飲暮有娼樓期  
平封還酒債堆金選蛾眉聲色狗馬外其餘一無知  
山苗與澗松地勢隨高卑古來無奈何非君獨傷悲

紫藤

藤花紫蒙茸藤葉青扶踈誰謂好顏色而爲害有餘  
下如蛇屈盤上若繩縈紆可憐中間樹束縛成枯株  
柔蔓不自勝嫋嫋挂空虛豈知纏樹木千夫力不如  
先柔後爲害有似諛佞徒附著君權勢君迷不肯誅  
又如妖婦人綢繆蠱其夫奇邪壞人室夫惑不能除  
寄言邦與家所慎在其初毫末不早辨滋蔓信難圖  
願以藤爲戒銘之於座隅

放鷹

十月鷹出籠草枯雉兔肥下鞞隨指顧百擲無一遺  
鷹翅疾如風鷹爪利如錐本爲鳥所設今爲人所資  
孰能使之然有術甚易知取其向背性制在饑飽時  
不可使長飽不可使長饑饑則力不足飽則背人飛  
乘饑縱搏擊未飽須繫維所以爪翅功而人坐收之  
聖明馭英雄其術亦如斯鄙語不可棄吾聞諸獵師

慈烏夜啼

慈烏失其母啞啞吐哀音晝夜不飛去經年守故林  
夜夜夜半啼聞者爲沾襟聲中知告訴未盡反哺心



百鳥豈無母爾獨哀怨深應是母慈重使爾悲不任  
昔有吳起者母歿喪不臨嗟哉斯徒輩其心不如禽  
慈烏復慈烏鳥中之曾參

鸞詩示劉叟叟有愛子背叟逃去叟甚悲念之叟少年亦嘗如是故作燕詩以諭之

梁上有双鸞翩翩雄與雌啣泥兩椽間一巢生四兒  
四兒日夜長索食聲孜孜青蟲不易捕黃口無飽期  
觜爪雖欲弊心力不知疲須臾干來往猶恐巢中饑  
辛勤三十日母瘦雛漸肥喃喃教言語一一刷毛衣  
一旦羽翼成引上庭樹枝舉翅不回顧隨風四散飛  
雌雄空中鳴聲盡呼不歸却入空巢裏啁啾終夜悲  
鸞鸞爾勿悲爾當返自思思爾為雛日高飛背母時

當時父母念今日爾應知

采地黃者

麥死春不雨禾損秋早霜歲晏無口食田中采地黃  
采之將何用持以易餼糧凌晨荷鋤去薄暮不盈筐  
携來朱門家賣與白面郎與君啖肥馬可使照地光  
願易馬殘粟救此苦饑腸

初入太行路

天冷日不光太行峯蒼莽嘗聞此中險今我方獨往  
馬蹄凍且滑羊腸不可上若比世路難猶自平於掌

鄧魴張徹落第

古琴無俗韻奏罷無人聽寒松無妖花枝下無人行  
春風十二街軒騎不暫停奔車看牡丹走馬聽秦箏



衆目悅芳艷松獨守其貞衆耳喜鄭衛琴亦不改聲  
懷哉二夫子念此無自輕

送王處士

王門豈無酒侯門豈無肉主人貴且驕待客禮不足  
望塵而拜者朝夕走碌碌王生獨拂衣遐舉如雲鵠  
寧歸白雲外飲水臥空谷不能隨衆人斂手低眉目  
扣門與我別沽酒留君宿好去采薇人終南山正綠

村居苦寒

八年十二月五日雪紛紛竹柏皆凍死况彼無衣民  
迴觀村間間十室八九貧北風利如劍布絮不蔽身  
唯燒蒿棘火愁坐夜待晨乃知大寒歲農者猶苦辛  
顧我當此日草堂深掩門褐裘覆絕被坐臥有餘溫

幸免饑凍苦又無壠畝勤念彼深可愧自問是何人

納粟

有吏夜扣門高聲催納粟家人不待曉場上張燈燭  
揚簸淨如珠一車三十斛猶憂納不中鞭責及僮僕  
昔余謬從事內愧才不足連授四命官坐尸十年祿  
常聞古人語損益周必復今日諒甘心還他太倉穀

薛中丞

百人無一直百直無一遇借問遇者誰正人行得路  
中丞薛存誠守直心甚固皇明燭如日再使秉王度  
奸豪與佞巧非不憎且懼直道漸光明邪謀難蓋覆  
每因匪躬節知有匡時具張爲墜網網倚作頽簷柱  
悠哉上天意報施紛迴互自古已冥茫從今猶不諭



豈與小人意昏然同好惡不然君子人何反如朝露  
裛相昨已天薛君今又去以我惜賢心五年如旦暮  
況聞善人命長短繫運數今我一涕零豈爲中丞故

秋池二首

前池秋始半卉物多摧壞欲暮槿先委夫霜荷已敗  
默然有所感可以從茲誠本不種松筠早凋何足怪  
二

鑿池貯秋水中蘋與芰天旱水暗消塌然委空地  
有似汎汎者附離權與貴一旦恩勢移相隨共憔悴

夏旱

太陰不離畢太歲仍在午旱日與炎風枯樵我田畝  
金石欲銷鑠况茲禾與黍嗷嗷萬族中唯農最辛苦

憫然望歲者出門何所覩但見棘與茨蘿生徧場圃  
惡苗承沴氣欣然得其所感此因問天可能長不雨

諭友

昨夜霜一降殺君庭中槐乾葉不待黃索索飛下來  
怜君感物節晨起步前階臨風踏葉立半日顏色衰  
西望長安城歌鍾十二街何人不歡樂君獨心悠哉  
白日頭上走朱顏鏡中頽平生青雲心銷化成死灰  
我今贈一言勝飲酒千杯其言雖甚鄙可破悒悒懷  
朱門有勲貴陋巷有顏回窮通各有命不繫才不才  
推此自裕裕不必待安排

丘中有一士二首命首句  
爲題

丘中有一士不知其姓名面色不憂苦血氣常和平



每選隙地居不踏要路行舉動無尤悔物莫與之爭  
藜藿不充腸布褐不蔽形終歲守窮餓而無嗟嘆聲  
豈是愛貧賤深知時俗情勿矜羅弋巧鸞鶴在冥冥

二

丘中有一士守道歲月深行披帶索衣坐拍無絃琴  
不飲濁泉水不息曲木陰所逢苟非義糞土千黃金  
鄉人化其風薰如蘭在林智愚與強弱不忍相欺侵  
我欲訪其人將行復沉吟何必見其面但在學其心

新製布裘

桂布白似雪吳綿軟於雲布重綿且厚爲裘有餘溫  
朝擁坐至暮夜覆眠達晨誰知嚴冬月支體暖如春  
中夕忽有念撫裘起逡巡丈夫貴兼濟豈獨善一身

安得萬里裘蓋裹周四垠穩暖皆如我天下無寒人

杏園中棗對

人言百果中唯棗凡且鄙皮皴似龜手葉小如鼠耳  
胡爲不自知生花此園裏豈宜遇攀翫幸免遭傷毀  
二月曲江頭雜英紅旖旎棗亦在其間如嫫對西子  
東風不擇木吹煦長未已眼看欲合抱得盡生生理  
寄言遊春客乞君一迴視君愛繞指柔從君怜柳杞  
君求悅目艷不敢爭桃李君若作大車輪軸材須此

蝦蟇和張十六

嘉魚薦宗廟靈龜貢邦家應龍能致雨潤我百穀芽  
蠢蠢水族中無用者蝦蟇形穢肌肉腥出沒于泥沙  
六月七月交時雨正霽電蝦蟇得其志快樂無以加



地既蕃其生使之族類多天又與其聲得以相誼譁  
豈唯玉池上污君清冷波何獨瑤瑟前亂君鹿鳴歌  
常恐飛上天跳躍隨姮娥往往蝕明月遣君無奈何

寄隱者

賣藥向都城行憇青門樹道逢馳驛者色有非常懼  
親族走相送欲別不敢住私怪問道傍何人復何故  
云是右丞相當國握樞務祿厚食萬錢恩深日三顧  
昨日延英對今日崖州去由來君臣間寵辱在朝暮  
青青東郊草中有歸山路歸去臥雲人謀身計非誤

放魚

自此後詩  
到江州作

曉日提竹籃家僮買春蔬青青芹蕨下疊臥雙白魚  
無聲但呀呀以氣相煦濡傾籃寫地上撥刺長尺餘  
豈唯刀机憂坐見螻蟻圖脫泉雖已久得水猶可蘇  
放之小池中且用救乾枯水小池窄狹動尾觸四隅  
一時幸苟活久遠將何如憐其不得所移放於南湖  
南湖連西江好去勿踟躕施恩即望報吾非斯人徒  
不須泥沙底辛苦覓明珠

文栢牀

陵上有老栢柯葉寒蒼蒼朝爲風煙樹暮爲宴寢牀  
以其多奇文宜升君子堂刮削露節目拂拭生輝光  
玄班狀狸首素質如截肪雖充悅目翫終乏周身防  
華彩誠可愛生理苦已傷方知自殘者爲有好文章

潯陽三題

并序

廬山多桂樹湓浦多修竹東林寺有白蓮花皆植物



之貞勁秀異者雖宮園省寺中未必能盡有夫物以  
多爲賤故南方人不貴重之至有蒸爨其桂剪棄其  
竹白眼於蓮花者予惜其不生於北土也因賦三題  
以唁之

### 廬山桂

偃蹇月中桂結根依青天  
天風繞月起吹子下人間  
飄零委何處乃落匡廬山  
生爲石上桂葉如剪碧鮮  
枝幹日長大根莖日牢堅  
不歸天上月空老山中年  
廬山去咸陽道里三四千  
無人爲移植得入上林園  
不及紅花對長栽温室前

### 湓浦竹

潯陽十月天天氣仍溫燠  
有霜不殺草有風不落木  
玄冥氣力薄草木冬猶綠  
誰肯湓浦頭迴眼看修竹  
其有顧盼者持刀斬且束  
剖劈青琅玕家家蓋牆屋  
吾聞汾晉間竹少重如玉  
胡爲取輕賤生此西江曲

### 東林寺白蓮

東林北塘水湛湛見底清  
中生白芙蓉齒齒三百莖  
白日發光彩清飈散芳馨  
洩香銀囊破瀉露玉盤傾  
我慙塵埃眼見此瓊瑤英  
乃知紅蓮花虛得清淨名  
夏萼敷未歇秋芳結纔成  
夜深衆僧寢獨起繞池行  
欲收一顆子寄向長安城  
但恐出山去人間種不生

### 大水

潯陽郊郭間大水歲一至  
閭閻半漂蕩城堞多傾墜  
蒼茫生海色渺漫連空翠  
風捲白波翻日煎紅浪沸



工商徹屋去牛馬登山避況當率稅時頗害農桑事  
獨有傭舟子鼓枻生意氣不知萬人災自覓錐刀利  
吾無柰爾何爾非久得志九月霜降後水涸爲平地

白氏文集卷第一

國



